

REGIONAL NEWS

HEADLINES:-

1. Political Party hrang hrang ten Lok Sabha inthlan vote thlak chungchang vawiina an party inkhawmah an thlirlet .
2. Home Minister Pu K Sapdangan Mizoramah mahni thawhna tur hmun ni lova thawk te Model Code of Conduct a zawh hunah chinfel a ni ang a ti.
3. Inner Manipur Parliamentary Constituency-a polling station 11 ah vote thlak that a ni.
4. President Draupadi Murmu chuan zanin hian civil mite chawimawina Padma Award hrang hrang Rashtrapati Bhavan-ah a sem dawn.

<><><>

POL PARTY

Political Party hrang hrang ten Lok Sabha inthlan vote thlak chungchang vawiina an party inkhawmah an thlirlet a,

ZPM MP Candidate Pu Richard Vanlalhmangaiha chuan thusawiin, Grape chingtute chungchangah zaa 35 lak chu a lar hle a, he thil hi a sawichhuah chhan chu mimal intih hmingchhiat a duh loh vang a ni, a ti.

Sawrkar laipui chuan Market Intervention Scheme neiin sum hloh rulh dan tur chungchangah State sawrkar tum ve tur zaa 25 leh Central sawrkar tum ve tur zaa 75 a awm a. Congress sawrkar lai khan Chief Minister ngeiin lehkha ziahsak mahse state sum thawh ve tur zaa 25 chu sum neih loh chhuanlamin an pe thei ta lova, a hnuah MNF sawrkar-ah pawh matching share an pe thei lo a. A tih theih dan tur nasa taka ngaihtuahin sum leh pai an seng nasa a, zaa 35 an sawiah khan chung senso zawng zawng chu khung khawm a ni a, mahse nasa taka amah beih nan an hmang ta hlauh a ni, a ti.

Pu Richard Vanlalhmangaiha chuan hetianga hma a la chung kut hnathawktute hmangaih ber ni awm taka an insawi thin chu a mak a tih thu a sawi a. Mimal intihhmingchhiat leh inbeih vak vak chu a tihdan leh duhdan a ni ngai lova, mahse tih ngaihna a awm tak lovah chuan Criminal Complaint pawh hreh tak chungin a theh lut ta a ni," a ti.

MNF Candidate Pu K Vanlalvena pawhin vawiin khan Mizo Hnam Run-a chung inkhawmah thu a sawi a, Campaign-na tur sum a nei lo a, hmun hrang hrangah mahni sum sengin amah tanpuitu te an feh chhuak a ti a, hman ni lawka tla hlim ni mah se; an party an inlungual tha a, tlin leh tlin loh chu Pathian thu thu ni mahse, beiseina sang tak a neih tih a sawi a ni.

BJP Mizoram State Office, Upper Republic ah karthar inhlanna leh Political Session aj State President MP Candidate Pu Vanlalhmuaka chuan thu a sawiin, BJP leh a thawhpuite chuan party dang sawichhiat ngawr ngawr chu an thupui a ni ve lo a, Congress leh a thawhpui INDI-Alliance tihdan ang lo takin dawt hmangin emaw party dang chhiatna lai khei vak chu an tihdan a ni ve ngailo a ti a, mi tinin an mamawh ang hmasawna an hmuh ve chu an thil tum a ni a, anmahni manifesto mipui tan malsawmna a nih theih nan tih hlawhtlin tumin hma an la mai thin zawk a ni," a ti.

Pu Vanlalhmuaka chuan Mizorama BJP te chu Missionary hna thawk an ni tih an inhriat angai a, Mizoram Kristian ram an intih ang hian an hnathawhna ah te, Sorkar hna an thawhna ah te, rinawm a ngai a, Pathian thu hi sawi nilovin nunah a lang tur a ni, a ti.

Hetihlai hian, Congress Party MLA candidate, tling zo ta lo Pu Vanneihthanga chuan vawiin khan Congress Party a chhuahsan a, A banna hi Party President hnenah thehlutin inthlan zawh hnuah media lamah let lehin hun eng emawchen a hna ngai a chhonzawm leh tawh a. Media leh active politics chu khawih kawp chi nia a hriat loh avangin, zahawm leh zau zawka media kaltlanga mipui tan rawng a bawl zui zel theih nan Congress party atanga ban tul a ti tih a sawi a ni.

<><><>

EARTH DAY

Tukin khan Earth Day 2024 pualin Mizoram a National Cadet Corps wing hrang hrangte chuan Aizawlah street rally an huaihawt a, Khatla atangin Kulikawn thleng kea kalin kawng an zawh, he hun ah hian 1 Mizo Air Sqn NCC, 1 Mizo BN NCC leh 20 Mizo Bn NCC te atangin cadet 140 an tel a, an PI staff mi pakua ten an hruai a ni.

Planet Vs Plastics tih thupui hmangin Department of Environment Forest & Climate Change huaihawt in Earth Day 2024 chu Chief Wildlife Warden Conference Hall, MINECO ah hman a ni bawk.

He hun hi Asst Principal Chief Conservator of Forest Pi Kalmal Preet-in a kaihruai a, he hunah hian Joseph Lalrinfela Hlimen hnenah "SEL Foundation Award for Clean & Green Earth" hlan a ni. Joseph Lalrinfela hi kum 9 mi a ni a, a hunawlah mipui lenkhawhawanna hmun hrang hranga plastic bawlhhlawh a chhar khawm thin avangin a thil tih that chawimawi nan tangkafai 25, 000/-leh Citation he hun ah hian an hlan.

Chawimawina hlantu, SEL Foundation neitu, Pi Saizampuii Sailo Environmentalist chuan Mizoram Environment cheureu nasa lutuk siamthatna kawnga mipui awareness siam nan, kumtin Award chi li siam an tum thu he hun ah hian a puang bawk a. Chung Award te chu:

1. World Wildlife Day March ni 3 a hman thin pualin nungcha humhalh tha khua hnenah tangka fai leh citation hlan te,
2. Wold Water Day March 22 a hman thin pualin Tuihna humhalh lama thawk tha mimal emaw pawl emaw hnenah tangka fai leh citation pek te leh
3. World Environment Day June ni 5 a hman thin pualin Environment remchem leh humhalh lam thawk tha mimal emaw, pawl emaw hnenah tangka fai leh citation pek te a ni a, hei bakah hian
4. Earth Day, April ni 22 a hman thin pualin Leilung humhim tura faina leh thianghlimna kawnga thawk tha mimal hnenah tangka fai leh citation pek tum a ni.

<><><>

HOME MINISTER

Home Minister Pu K Sapdanga chuan Mizoramah aikal mi 3365 zet an awm a, mahni thawhna tur hmun ni lova thawk an tam em em bawk a, heng mite hi Model Code of Conduct a zawh hunah chinfel a ni ang a ti.

Vawiina ZPM Party Office ah thusawiin Pu K Sapdanga chuan, aikala rawih te chu Sawrkar mi ni si lo, sawrkar thu leh hla hre tur leh thawk tura rawih an ni a, thil tisual pawh nise sawrkar mi an nih miao loh avangin hrem ngaihna pawh awm lo a. An duh hun hunah confidential work an bih thei a, a pawl tak zet a ni a ti a. A chhe lai siam that hna thawh tur a tam a, an thawk thuai ang a ti a. ZPM

sawrkarah chuan a thar tam tam an vannei dawn a, rim taka thawktu chu ZPM an ni emaw ni lo emaw, a hlawkna teltu an ni zel dawn a ti.

Home Minister Pu K.Sapdanga chuan, Lok Sabha inthlanpuiah khan party dang zawng zawng aiin an phur a, an chechhuak nasa baw k tih sawiin hetiang tak maia sawrkar lai Lok Sabha inthlana phur leh chechhuak nasa hi an awm a la hre ngai lova, neutral te khawngaih khawpin an thawkrim a ni a ti a, inthlanah khan ruling party berin sum an chelek miau lova, party dang tan chuan chelek ngaihna a awm lo a ti a. Kalphung tharah inthlanna danglam leh chhinchhiah tlak tak an tawng a ti.

Pu Sapdanga chuan, "Health Care bill ba, Police TA/DA pungkawm fe tawhte leh Eng chhit man ba, vaibelchhe tam tak tlingkhawm tawh chu thla 4 chhunga an petla thei mai chu a mak a ni a ti a, sawrkar laipui atanga Disaster Management lama sum hman tur April thla tira rial leh thlipuiin a nuai hma khan an dawng vek hman a, chhiat tawkte puihna tur kan pechhuak nghal thei a ti baw k a. Kumin April 1 atangin ZPM budget a intan ve chiah a, hma tak tak an la chho tan ve dawn ta a ti.

<><><>

RARE SPECIES VANGA

Sava vang leh hlu Vangá chu Thaltlang khaw ram chung, Phawngpui National Park nena in ri na ah a thla lak fuh a ni a, Mizoramah Vangá ala awm ngei a ni tih a tih chian mai bakah kum 10 hnu ah Vanga hi Mizoram ah anla awm ngei tih finfiahna chiang taka neih theih awmchhun a ni.

Vanga hi Blyth's Tragopan Tragopan blythii a ni a, Conservation Mizoram ten April ni 7 khan Mizorama sava zirchianna an kalpui mek laiin a thla hi an la fuh a, Conservation Mizoram President Pu Rochamliaana chuan he sava thla la tur hian kum 2001 vel atang tawh khan an mahni sum leh tha seng in hma anlo lak tawh thu a sawi a, tun tuma he sava thla an la fuh hi an lawm hle a ni a ti.

Vangá hi Nagaland State Bird a ni a, International Union for Conservation of Nature (IUCN) leh BirdLife International te chuan mang mai hlauhawm hnai tawh 'Vulnerable' category ah an dah a. An chenna ram chereu zel vang te, an sa, ei atana pèl thin an awm avang te in tlem lam an pan zel nia hriat a nih avangin mitin ten Vangá mai nilo Mizoram chhunga nungchate leh an chenna hmun te humhalh a, vawnhim chungchangah nasa zawka tan la turin Conservation Mizoram te chuan Mizoram mipui an chah a ni.

<><><>

LOK SABHA

Inner Manipur Parliamentary Constituency-a polling station 11 ah vote thlak that a ni. Election Commission chuan zing dar 7 atanga tlai dar 5 thleng vote thlak tir turin state election hotute a hriattir a. Heng polling station 11 te hi karhmasa zirtawpnia inthlan thawhkhatnaah khan tharum thawhna avangte, EVM tihchhiat avangte leh proxy voting avangtein inthlan tihbuai a ni a. Vawiinah vote thlak that tir an ni ta a ni.

Hetihlai hian Lok Sabha inthlanpui thawhnhina atana campaign chuan a vawrtawp a thleng chho mek a, Zirtawpniah vote thlak a ni ang.

<><><>

PADMA AWARD

President Draupadi Murmu chuan zanin hian civil mite chawimawina Padma Award hrang hrang Rashtrapati Bhavan-ah a sem dawn.

President Murmu hian Vice President hlui M Venkaiah Naidu leh Bharatnatyam dancer Dr. Padma Subrahmanyam te hnenah a hlan dawn a. Bideshwar Pathak chu a thih hnuah Padma Vibhushan hlan a ni bawk ang.

Padma Bhushan dawng tur zingah filmstar Mithun Chakraborty leh zaithiam Usha Uthup te an tel a. Anni bakah hian philanthropist Dr Sitaram Jindal, cardiologist Dr. Tejas Madhusudan Patel leh Uttar Pradesh Governor hlui Ram Naik te an tel.

Padma Awards hi civil mite chawimawina niin chhawng thuma then a ni a, Padma Vibhushan, Padma Bhushan leh Padma Shri te an ni a. Vantlang leh mihringpuite tana thawk tha leh mi bikte hnenah hlan thin a ni.

<><><>

MEDICAL TERMINATION

Maharastra-a hmeichhe kum 14 mi pawngsual avanga naupai chu Supreme Court in damdawi hmanga nau tihtlak a phalsak. Supreme Court chuan Mumbai-a Lokmanya Tilak Hospital Dean chu nau tihtlak dan tur ruahmanna siama doctorte lo inpuahchah tir turin a hrilh a. Pawngsual avanga rai hmeichhia hian naute kar 28-a upa a pai mek a. Medical team ten nau a pai chhonzawm zel chuan a taksa leh rilru ah thil tha lo nghawng a nei dawn nia Court an hrilh avangin nau tihtlak hi Court chuan a phalsak ta a ni. Nau tihtlakna sum mamawh leh senso dang zawng zawng hi state sawrkar chuan a tum dawn bawk a ni.

Hetihlai hian Medical Termination of Pregnancy (MTP) Act ah chuan nu pasal nei laite, pawngsual tawk leh rualbanlo hmeichhiate tan damdawi hmanga nau tihtlak hi thla 24 a tlin hma thleng phalsak a ni.

<><><>